

## **Máánu lii šoddâm!**

– Sämitige säämi párnáikulttuurkuávdáš lii uázžum uđđâ noomâ.

Säämi párnáikulttuurkuávdáš piejâi joton nommâkišto čohčâmáánu 30. peeivi já toolâi kišto kidâ roovvâdmáánu aalgâ räi.

Ton räi iävtuttâsah pottii ohtsis nelji veikkâ kištoäigi kuhedui. Tai iävtuttâsâi juávhust ij kavnum ohtâgin nommâ, mon ličij puáhtám valjiđ párnáikulttuurkuávdáštooimâ nommân. Iävtuttâs koolgâi leđe uánihâš, tooimâ kovvejeijee sâmikielâlâš nommâ, mii kovvee säämi párnáikulttuurkuávdáá tooimâ.

Kišto lâi aalgâst uáivildum vuálá 18-ihásáid, mut uáccáá uásálistem keežild valjimčuákkim meridiij vijđediđ kišto sâminuorâi konfereensân mii tollui Suáluičielgist 13.-14.10.2011.

Nuorâi konfereensâst pottii ohtsis 18 nommâiävtuttâssâd. Puoh lijjii čaallum tavesâmikielân.

Vyeitten väljejui MÁNNU (máánu). Taam lii iävtuttâm nuorâ 21 –ihásâš uáppee Aletta Lakkala, kote áásá Anarist.

Lakkala lii muštâlâm jieijâs iävtuttâs siskáldâs, tavesâmikielân sääni stavâlijn kávnovejeh tooimâ čuásáttâhjuávhuh, párnááh sehe nuorah. MÁNNU kávnoo meiddei ärbivuávâlijn mainâsijn. Mainâstem lii ohtâ ovdedemuorgijn párnáikulttuurtoomâin.

Nommâiävtuttâsâiguin láá čokkânâm Tiina Sanila-Aikio, Inka Nuorgam, Petter Morottaja já Petra B. Magga-Vars. Valjimčuákkim agâstâl vyeitteeiävtukkâs návt:

MÁNNU- nommâ lii šiev utkos, uánidum merhâšume párnáin já nuorâin. Sääni lii tommittáá abstraktlâš já siämmást konkreetlâš já ton puáhtá ovtâstittiđ ärbivuávâlâš ohtâvuodâid, mut meiddei máánu puáhtá sárguđ, párnâi movtijdittee tiädáttâssáid já tooimân. Máánu pástá puohháid sâmipárnáid- já nuoráid. Máánu jurâmân lohtâseh maangah ärbivuávâliih pargoh já tooimah tegu kamuvsuoinij já tyejiamnâsij aamnâstmist poccuu njuovâmân.

MÁNNU –sääni ij siáhán eres projektáid, tooimâi já organisaatioi noomáid. Tot sojá puoh Suomâ sâmikieláid älkkeht.

Nommâkišto vyeittee Aletta Lakkala palhâšuvvoo 200 euro árvusáin skenkkâkorttáin Sámi Duodji-káávpán Anarân.

Lasetiäduh: Tooimâstivrejeijee Petra Biret Magga-Vars puh. 040-732 5503